

Stagiunari tranter rodas ed aissas

Inschign è sch'in fa ord gist dus hobis sia clamada

DA CLAUDIA CADRUVI / ANR

■ **Cura che auters gaudan il sulegl, lavura Sepp Birchler. El gudogna ses paun da mintgadi cun aissas e rodas. U ditg pli precis – l'enviern cun ils skis e la stad cun inline-skates.**


Quests dis finescha el sia stagiun a Malögia. Là è el schef da la scola da sport d'enviern. Cun sia fatscha brina da scolast da skis arriva el en la Bassa tar la glied ch'è tut pallida da quests dis bruts. *Sepp Birchler* vegn cun bell'aura ed avra sia butia dad inline-skates. Quella sa chatta en la planira da la Linth, en in lieu fitg apprezzà per ir a spass cun velo u... cun chalzers cun rodas.

La glied sa regheglia, mitscha ora en il liber e gauda da puspè pudair sa muventar. Bain inqualin vegn «muotis» la primavaira, empresta ses emprims inline-skates tar *Sepp Birchler*. E perquai ch'igl è uschè simpel e lom dad ir sin questas rodas cumpr'ins gist in pèr da quests chalzers.

Turnà cun il trend ord l'America

Avant tschintg onns ha *Sepp Birchler* vulì sa perfecziunar en anglais. El ha passentà in mez onn en l'America. Ma turnà en Svizra n'ha el chattà nagina lavur pli. Cunquei ch'el aveva era la patenta da scolast da passlung ha el dà intginas emnas scola ad Einsiedeln, nua ch'el è creschì si. Ma cun la primavaira hai tutgà da tschertgar in'otra occupaziun.

En l'America aveva *Sepp Birchler* emprendì d'enconuscher ils novs chalzers da rodas – ils inline-skates. Ed era da nossas varts ha quest trend cumenzà a flurir gist quels onns. *Sepp Birchler* ha fittà in char e cumprà intgins pèra inline-skates. Il char ha el postà a Benken ed ha cumenzà a dar a fit ils chalzers per mintgamai in'ura. Sco scolast da pass-



L'enviern èsi las aissas e la stad las rodas, cun las qualas Sepp Birchler gudogna ses daners.

ANR

lung aveva el er bunas premissas per dar curs per ir cun inline-skates.

Lieu ideal

Da l'occupaziun provisoria hai dà entaifer curt temp ina veritabla fatschenta. «Jau aveva tuttina en senn da far insatge auter ch'adina lavurar en biro», raquinta l'um da fatschenta oz. El haja era pudì bajegiar si sia fatschenta cun paucas investiziuns.

Cletg ha *Birchler* er gì cun il plaz, nua ch'el ha postà l'emprim onn ses char. Per l'ina è quest plaz in lieu ideal a la sortida da l'autostrada. Igl è in lieu ch'ins cuntanscha svelt nà dals chantuns Sviz, Turitg e Son Gagl. Benken era gia avant enconuschent tar velocipedists e passlungists per las bellas vias e cuntra-das planivas. En il decurs dals davos tschintg onns è il plaz, nua che *Birchler*

lavura, daventà il punct da partenza da differents percurs per «skaters».

Pur sa gida

Da gronda impurtanza è dentant stà ch'il pur *Fritz Landolt* ha adina sustegnì *Sepp Birchler* e tolerà il schuschuri da skaters las sairas e las fin d'emnas enturn sia stalla. Gia la segunda stagiun ha il char numnadamain betg pli tanschì sco butia. Tar *Landolt* ha *Birchler* pudì fittar ina part da la stalla ed installar ses inlineshop ch'el ha puspè ingronchè questa primavaira.

Sia butia è uss enconuscenta en l'entira regiun da la Linth ed anc pli lunsch enturn tar ils skaters passiuonads. Là pon ins empristar ils pli novs e «sperts» chalzers, schar pinar ils veders u simplamain far in paus e dar ina baterlada.

Betg in trend che varga

«Cura che jau hai cumenzà ha la glied manegià ch'i na giaja betg ditg ch'ins saja unfis da quest trend e mintgin haja ses inline-skates.» Ma questa admoniziun, che *Birchler* ha udi bleras giadas, n'è fin uss betg sa verifitgada.

L'interess per quest sport è s'augmentà mintg'onn. Adina dapli gruppas u fatschentas reserveschan curs u turas en l'inlineshop. *Birchler* e persvadì che quest sport da fitness per giuven e vegl vegn a lunga vista a s'establi, là nua ch'i dat las vias lateralas asfaltadas. Era en l'Engiadina fastisescha *Birchler* ch'ins sa prova d'augmentar las pussaivladads per ir cun inline-skates.

En mintga cass n'è la glied anc betg stuffientada. E co statti cun *Sepp Birchler* sez? È el ventiraivel cun questa butia e la lavur sin rodas? «Gea», respunda el senza traglinar. E l'atun sch'el è lura tuttina in zichel unfis d'adina mussar e declarar il medem, serra el las portas da ses shop, emblida per ina stagiun ils chalzers cun rodas e va a Malögia. Là spetgan lura puspè las aissas.

L'inlineshop chatt'ins damanaivel da la sortida A 13 Reichenburg, en direzziun Benken vis à vis ustaria Stern.

Curt e bun

Num: Sepp Birchler
Domicil: Malögia / Wilen (Wollerau)
Naschì: ils 1-3-1960
Segn: pesch
Spisa preferida: pasta
Bavronda preferida: vin cotschen
Persuna fitg stimada: Winston Churchill
Lieu da vacanzas: il mar!